

NESTRI SIGNÔR JESÙ CRIST RE DAL MONT INTÎR

Antifone di jentrade Ap 5,12; 1,6

L' Agnel che al è stât copât al merte di vê
potence e ricjece, sapience e fuarce e onôr:
a lui la glorie e la potence tai secui dai secui.

Si dîs Glorie a Diu.

Colete

Diu onipotent e eterni,
che tu âs volût tornâ a fâ dutis lis robis
in Crist, to Fi, Re dal mont intîr,
danus la gracie
che dute la creazion, sfrancjade de sclavitût,
e servissi la tô maiestât e ti laudi cence mai finî.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Ez 34,11-12.15-17

Vualtris o sês lis mêis pioris: jo o judicarai fra piore e piore.

Dal libri dal profete Ezechiel

Il Signôr, gno Diu, al dîs cussì: «Ve, o larai jo a cirî lis mêis pioris e lis contarai une par une. Come che il pastôr al conte lis pioris une par une, cuant che al è framieç des sôs pioris che si son dispierdudis, cussì o contarai lis mêis pioris une par une e lis menarai a salvament di ogni lûc là che si jerin sparniçadis tai dîs di fumate e di scûr. O sarai jo a menâ a passon lis mêis pioris e a regonâlis – sentence dal Signôr, gno Diu –. Chê che si è pierdude o larai a cirîle, chê che si je slontanade le fasarai tornâ dongje, chê che si je dissipade le fasarai, chê inmalade le fasarai dâ di ca; e o vuardarai chê grasse e tombolade. Lis passarai come cu va.

Sul vuestri cont, pioris mêis, il Signôr, gno Diu, al dîs cussì: Viodêt! O judicarai fra une e chê altre, fra rocs e becs».

Peraule di Diu.

SALM RESPONSORIÂL dal Salm 22

R. Tu mi menis, Signôr, intal ream de vite.

Il Signôr al è il gno pastôr: no mi mancjarà nuie.

Mi fâs polsâ là che i passons a sverdein,
mi mene là che a son aghis frescjis.

Al tire sù la mê vite, in gracie dal so non
mi mene par trois di justizie. **R.**

Ancje se o ves di cjaminâ par une foranate scure,
di nissun mâl no varès pôre, parcè che tu mi sês dongje;
il to baston e la tô vuiscje
a son lôr che mi parin. **R.**

Tu prontis denant di me une taulade
presince dai miei nemîs,
il gno cjâf tu âs onzût di vuela
e il gno bocâl al è plen che al stranfe. **R.**

Propit, bontât e boncûr mi compagnaràn
ducj i dîs de mê vite,
te cjase dal Signôr
par une vore di agns o restarai. **R.**

SECONDE LETURE 1 Cor 15,20-26.28

Al consegnarà il ream a Diu Pari, par che Diu al sedi dut in ducj.

De prime letare di san Pauli apuestul ai Corints

Fradis, Crist al è stât riesussitât dai muarts, primizie di chei che a duarmin. Parcè che, se midiant di un om e je vignude la muart, midiant di un om e je ancje la resurezion dai muarts; e come che ducj a muerin in Adam, cussì ducj a saran fats vivi in Crist. Par altri, ognidun tal so puest. Prime Crist, che al è la primizie; po, cuant che al tornarà, chei di Crist; e po e sarà la fin, cuant che al consegnarà il ream a Diu Pari, dopo di vê ridusût a nuie ogni principât, potestât e potence. Di fat al scuèn regnâ fin che nol varà metût ducj i siei nemîs sot dai siei pîts. L'ultin nemî a jessi ridusût a nuie e sarà la muart. E cuant che dut al sarà sometût, ancje lui, il Fi, al fassarà at di submission denant di Chel che i à sometude ogni robe, par che Diu al sedi dut in ducj.

Peraule di Diu.

CJANT AL VANZELI cf. Ap 1,8;2,25

R. Aleluia, aleluia.

Jo o soi l'Alfa e l'Omega, chel che al è, che al jere e che al ven:
tignît salt il don de fede par cuant che o tornarai.

R. Aleluia.

VANZELI Mt 25,31-46

Si sentarà su la sô sente di glorie e ju dividerà un dal altri.

Dal vanzeli seont Matieu

In chê volte, Jesù al disè ai siei dissepui: «Cuant che il Fi dal om al vignarà te sô maiestât, compagnât di ducj i siei agnui, alore si sentarà su la sô sente di glorie e denant di lui a saran dadis dongje dutis lis nazions; lui ju dividerà un dal altri, come che il pastôr al divît lis pioris dai rocs, e al metarà lis pioris a la sô diestre e i rocs invezit a la sô çampe. Alore il re ur disarà a di chei che a son a la sô dijestre: Vignît ca, benedets di gno Pari, a cjapâ paronance dal ream prontât par vualtris di cuant che al è stât fat il mont. Parcè che o ài vude fan e mi vês dât di mangjâ; o ài vude sêt e mi vês dât di bevi; o jeri peligrin e mi vês sotetât, crot e mi vês vistût, malât e o vês viodût di me, o jeri in preson e o vês stât a cjatâmi. Alore i juscj i disaran: Signôr, cuant ti vino viodût plen di fan e ti vino dât di mangjâ, plen di sêt e ti vino dât di bevi? Cuant ti vino viodût peligrin e ti vino sotetât? Crot e ti vino vistût? Cuant ti vino viodût malât o in preson e vino stât a viodi di te? E il re ur rispuindarà: Us al dîs in veretât: dut ce che o vês fat a un dai plui piçui di chescj miei fradis, mal vês fat a mi. Po ur disarà a di chei che a son a la sô çampe: Lait lontans di me, maledets, tal fûc eterni, prontât pal diaul e pai siei seguaçs. Parcè che o ài vude fan e no mi vês dât di mangjâ, o ài vude sêt e no mi vês dât di bevi, o jeri peligrin e no mi vês sotetât, crot e no mi vês vistût, o jeri malât e in preson e no vês stât a cjatâmi. Alore i rispuindaran ancje lôr disint: Signôr, cuant ti vino viodût plen di fan o di sêt, peligrin o crot, malât o in preson e no vino viodût di te? Alore ur rispuindarà disint: Us al dîs in veretât: ce che no i vês fat a un di chescj plui piçui, no mal vês fat a mi. E chei chi si 'nt laran tal cjastic eterni, i juscj invezit a la vite eterne».

Peraule dal Signôr.

Si dîs O crôt.

Su lis ufiertis

Ti ufrìn, Signôr, la vitime che e à riconciliât la gjernazie umane
e o preìn cun umiltât che to Fi

ur dedi a ducj i popui i regâi de unitât e de pâs.
Lui che al vîf e al regne tai secui dai secui.

Antifone a la comunion Sal 28,10-11

Si è sentât il Signôr re par simpri:
al benedissarà il so popul cu la pâs.

Daspò de comunion

Daspò di vê spartît il pan de immortalitât,
ti preìn, Signôr,
di tignîsi in bon di ubidî ai comandaments di Crist, Re dal mont intîr,
par podê vivi par simpri cun lui tal ream dal cîl.
Lui che al vîf e al regne tai secui dai secui.